

PUO YA SETHO SA LEKGOTLA LA PHETHAHATSO LEFAPHENG LA DIPAPADI, BONONO, SETHO LE BOIKGATHOLLO, NTATE D.A.M.KGOTHULE, KETEKONG YA LETSATSIS LA MORENA MOSHWESHWE, QWA QWA

12 March 2011

Motsamaisi wa Mosebetsi
Bahlomphehi
Bomme le Bontate
Setjhaba sa Hesob
Selelekela

Ntumelleng ke dumedise ke nto boka Thesele Pharu e telele-telele, Lepoqo, Tlaputle. Ha di bokwe!!! Ke motlotlo ho ba karolo ya keteko ena ya letsatsi la morena Moshweshwe, mothehi wa setjhaba sa Basotho. Keteko ena ya letsatsi la morena Moshweshwe e tlameha ho ba karolo ya nalane ya rona jwaloka setjhaba sa Basotho hammoho le ma-Afrika ka kakaretso kaha morena Moshweshwe e ne e le mohale ho bohle.

Ke boetse ke dumela hore keteko ena ke ya bohlokwahadi kaha ke motheo wa ho ntshetsa pele ditabatabelo tsa Basotho le ma-Afrika e leng ho sireletsa setso, botjhaba le puo ya rona jwaloka setjhaba sa Rantsho. Motsamaisi wa mosebetsi, ke boikarabelo ba mang kapa mang ho netefatsa hore setso le botjhaba ba rona ha e be le feela la mafeela. Phepetso eo re tobaneng le yona matsatsing ana ke ho netefatsa hore setso le botjhaba ba rona ha bo felle moyeng jwaloka phoka ya mesong ha letsatsi le tjhaba, kapa jwaloka mofufutso boyeng ba ntja.

Tsa Morena Moshweshwe:

Ha ke bua ka morena Moshweshwe ke rata ho itshetleha ho e meng ya mesebetsi e kgabane ya Mme Mamothibedi Sehlabo eo pako ya hae ya mothei enwa wa setjhaba sa Basotho e tswileng matsoho. Pakong ya hae Mme Sehlabo o a hlalosa hore ha re bua ka Morena Moshweshwe re bua ka Motlotsuwa wa Modimo; Morena le Moetapele; Mohale; Mothehi wa setjhaba sa Basotho; Mmetli wa tsela ya Poelano le Tshwarelano le Mo-Diplomate.

Dintlha tsena kaofela ke kakaretso ya sebopeho sa mohale enwa eo re mo ketekang kajeno. Ke Moshweshwe Moshweshwailane wa Kali Lebeola le neng le beole Ramonaheng ditedu le ho hloma ha di so hlome, ekaba ke hona di tla hloma maisao. Bokgabane ba mohale enwa bo ipaka polelong ena e bileng karolo ya bohlokwa ya puo le setso sa Basotho.

Kaha dibui tse ding di se di hlalositse mme di ntse di tla hlalosa haholwanyane ka kakapa ena ya Mosotho e re ke re kgalo nke ke bue ka karolo eo rona re leng mmuso re e bapalang ho ntshetsa pele mosebetsi wa ho boloka botjhaba le setso sa rona.

Bohlokwa ba Setso le Botjhaba

Ke batla ho toboketsa hore ntshetsopele ya setso le botjhaba ba setjhaba sa rona sa Afrika ke phepetso e kgolo e hlokang hore kaofela ha rona re fine seledu, re tlame matheka mme re phahamise dihloho ho sireletsa seo e leng sa rona. Re tlamehile hore re be motlotlo ka seo re leng sona. Re tlamehile hore re kgabe ka nalane ya rona jwaloka Ma-Afrika kapa Ma- Afrika Borwa.

Ke a tshepa hore kaofela ha rona mona re le hlokolotsi ka tsela eo setso le botjhaba ba rona bo seng bo qhelelwa ka thoko, ka tsela eo bo nyenyefatswang kateng masedinyaneng. Ha re sheba ditshwantsho thelevishineng kapa hona dikoranteng seo re se bonang ha se se bontshang botjhaba ba rona jwaloka Ma-Afrika.

Mmino oo re o mamelang, puo eo re e ultwang, ditshwantso tseo re di bonang ha di amane le botjhaba ba rona. Ke kahoo mmuso ona wa rona okentseng tshebetsong melawana kapa dipehelo ho mokgatlo wa tsa phatlalatsa hore diphatlalatsa tsa masedinyana a tshwanang le diyalemoya le thelevishine di leke ho phatlalatsa ditaba tse amanang le botjhaba ba ona jwaloka Ma-Afrika Borwa.

Ka tsela e jwalo re na le boikarabelo bo boholo jwaloka batswadi ho netefatsa hore re ruta bana ba

rona ka bahale ba rona ho tshwana le morena Moshweshwe, Hintsisa, Chaka le ba bang. Re na le boikarabelo ba ho ruta batjha ka bapofeta le bahale ba rona ho tshwana le Mantsopa, Nonqawuse le ba bang. Re na le boikarabelo ba ho ruta batjha ba rona ka boitshwaro ba rona jwaloka Ma-Afrika bo kenyelletsang botho, tlhompho le boikokobetso.

Sena ke boikarabelo ba mang kapa mang eo e leng motswadi, eo e leng Mo-Afrika Borwa. Kaofela ha rona re tlameha ho kenya letsoho morerong wa mmuso ho ntjhafatsa boitshwaro ba rona jwaloka baahi le tjhebelopele ya Mopresidente Thabo Mbeki ya tsosoloso ya Afrika, kappa yona "African Renaissance" ka puo ya sehlapi.

Karolo ya Mmuso:

Motsamaisi wa mosebetsi, bomme le bontate, re le mmuso re finne seledu ho netefatsa hore botjhaba le setso sa rona ha e be lefeela la mafeela. Jwaloka mmuso re thehile Setsi sa Botjhaba sa Basotho (Basotho Cultural Village) eo ka yona re lekang ho ntshetsa pele botjhaba le setso sa Basotho. Re boetse re thehile ditsi tsa setso tse kang Mmabana Cultural Centre mane Thaba Nchu, Thabong Cultural Centre mane Thabong (Welkom) le Zamdela Cultural Centre mane Zamdela (Sasolburg).

Le ha ditjhelete di fokola re leka ka hohle hore kabo ya ditekanyetso e lebiswe haholo tsamaisong ya tsa setso le botjhaba. Karolo ena ya Lefapha ke e nngwe ya tse kgolohadi ka hara Lefapha hobaneng ho rona re le mmuso setso le botjhaba ke taba ya bohlokwa. Ka mekete e tshwanang le MACUFE re tswela pele ho etsa bonnete ba hore botjhaba le setso sa rona bo ba ka sehlohlolong. Re tla thabela ditshisinyo le dikeletso ho tswa ho lona Basotho hore ke eng seo re ka se etsang ho feta mona ho ntshetsa morero ona pejana, etswe letshwele le beta poho mme ntjapedi ha e hlolwe ke sebata.

Ntshetsopeleng ya puo ya Sesotho, re le Lefapha, ka Karolo ya rona ya Ditshebeletso tsa Puo, re ntshetsa pele, ho bokella le ho baballa mareo a Sesotho, puong ka boyona le diphetolelong ho tswa puong tse ding. Re bile le diprojeke tse mmalwa ho thatiseletsa taba ena, tse kang:

a. Bukana ya mareho a papadi ya bolo a Sesotho. Selemong sa 2010, re ile ra kgakola bukana ya mareo ao le ho e fumantsha setjhaba.

b. Phatlalatso ya Mokolokotwane: Nakong ya mokete wa dingolwa o ileng wa bitswa Wordfest nakong ya MACUFE a 2008, diqapi le diroki tse fapaneng ka hara Foireisetata, di ile tsa nehelana ka dithothokiso tsa tsona tse ileng tsa phatlalatswa e le bukana e bitswang Mokolokotwane. Bukana ena e ile ya kgakolwa le ho fumantshwa setjhaba selemong sena ka kgwedi ya Hlakola.

c. Ho thakgolwa ha Foramo ya Bangodi ba Foreisetata: Kamora dikopano pakeng tsa Ditshebeletso tsa Puo le mekgatlo ya bangodi le baamehi ba bang ditabeng tsa Dingolwa, ho thakgotswe Foramo ya Bangodi ba Foreisetata, ka la 12 Hlakola 2011, moketeng o neng o tshwaretse Maokeng.

Ka tsela ena, Lefapha le utlwisisa hore ka ntshetsopele ya dingolwa, puo le yona e ntshetswa pele, le ho bolokwa e le letlotlo molemong wa matlobo a tlang.

Pheletso:

E re ke phethele ka ho boela ke lebisisa diteboho ho bahlophisi ba mokete ona le ka memo eo re e fumaneng ho ba karolo ya mosebetsi ona. Ha ho qeaqeo hore re ka fihlella tse ngata hafeela re ka dula re le ngatana e le nngwe, ho ntshetsa lebitso la morena Moshweshwe pele le ho le phahamisa ho ba sehlohlolong moo le tlamehang ho dula le le teng.

Ke a leboha, ha di bokwe!!